

आकाशवाणी जयपुर-अजमेर  
प्रादेशिक समाचार

दिनांक 09.05.2024

समय: 18.45 बजे

- राज्यपाल कलराज मिश्र राज्य रा संतुलित अर लगातार विकास सारू सगळा ऊं मिल र काम करण बाबत कह्यो।
- प्रदेश मांय चिकित्सा विभाग री ओर ऊं खास जांच अर जागरूकता अभियान चलायी ज्यो-27 आकांक्षी ब्लॉक सारू राज्य स्तर री टीमां बनायी ज्यी।
- प्रधानमंत्री अर मुख्यमंत्री महाराणा प्रताप री जयंती रे मौके वां ने सिरधा भाव सागे याद कीना।
- प्रदेश मांय पड़ रह्या जोरदार तावड़ा ऊं जिंदगी माथे असर पड़्यो-बाड़मेर अर बीकानेर मांय पारो 45 दशमलव 2 डिग्री सैल्सियस दर्ज करी ज्यो।

000

राज्यपाल कलराज मिश्र राज्य रा संतुलित अर लगातार विकास सारू आदिवासी कल्याण, भणार्ई-लिखार्ई, खेती-बाड़ी, पर्यटन अर उद्योगां रा हलकां मांय सुनियोजित योजनावां रे जरिए लम्बा बगत रा विकास ने ध्यान राखता थकां काम करण बाबत कह्यो है। वे आज जयपुर रा राजभवन मांय राज्यपाल सलाहकार मण्डल री मीटिंग मांय बोल रह्या हा। मीटिंग मांय राज्यपाल सलाहकार मण्डल रा सदस्य आदिवासी हलकां मांय महिला विश्वविद्यालय खोलण री राय दीनी।

0000

राज्य मांय मायड़ां अर टाबरां रा स्वास्थ्य समेत न्यारी-न्यारी चिकित्सा सेवावां ने मजबूत बनावण सारू आज खास निरीक्षण अर जागरूकता अभियान चलायी ज्यो। ई सारू 27 आकांक्षी ब्लॉक बाबत् राज्य स्तर री टीमां बनायी ज्यी। अभियान रा तहत अस्पतालां मांय जच्चा-बच्चा रा स्वास्थ्य ऊं जुड़्या सुबीतां, मौसमी बीमारियां, लू अर गर्मी रे कारण व्हेवण वाळी बीमारियां रा प्रबंधन री जांच करी ज्यी। **अजमेर** री जिला कलेक्टर डॉ. भारती दीक्षित पिसांगन सामुदायिक स्वास्थ्य केंद्र रो दौरो कर र व्यवस्थावां रो जायजो लीनो। **डूंगरपुर** रा जिला कलेक्टर झौंथरी ब्लॉक रा सुराता मांय प्राथमिक स्वास्थ्य केन्द्र रो दौरो कर र वठे री व्यवस्थावां रो जायजो लीनो। **बूंदी** मांय मुख्य चिकित्सा अधिकारी

सीचसी खटकड़ मांय लू ताप घात रा वार्ड समेत मुफ्त दवाई, बायोमेडिकल कचरा रा निपटारा, साफ-सफाई, जापा कराया जावण वाळा कमरा, शौचालय अर वार्ड समेत न्यारी-न्यारी ठोड़ां रो दौरा कर र व्यवस्थावां रो जायजो लीनो अर अहलकारां ने जरूरी हुकम दीना।

0000

राज्य मांय आज "सुरक्षित मातृत्व दिवस" मनायी ज्यो। ई रा तैत न्यारा-न्यारा अस्पतालां मांय आस वाळी लुगाइयां री मुफ्त स्वास्थ्य जांच कर र जरूरी राय दीरीजी। **बूंदी** मांय आस वाळी लुगाइयां ने पोषण वाळा खाण-पीण रा बारा मांय जाणकारी ई दीरीजी। ई मौके **सवाईमाधोपुर** जिला मांय ई न्यारा-न्यारा अस्पतालां, प्राथमिक चिकित्सा केंद्रां, शहरी प्राथमिक स्वास्थ्य केंद्रां, आंगनबाड़ी केंद्रां अर सामुदायिक स्वास्थ्य केंद्रां माथे आस वाळी लुगाइयां री जापा ऊं पैली री जांच कर र वां ने जरूरी राय अर दवाइयां दीरीजी। **बारां** मांय चिकित्सा अर स्वास्थ्य विभाग रा अहलकार मातृ अर शिशु स्वास्थ्य अर परिवार कल्याण ऊं जुड़ी सेवावां अर कामकाज रो जायजो लीनो।

000000

चिकित्सा अर स्वास्थ्य मंत्री गजेन्द्र सिंह खींवर कह्यो है के ऊपतू अंग लगावण सारू फर्जी एन.ओ. सी. जारी करण रा मामला री पूरी गहराई ऊं जांच करायी जावेला। आज जयपुर मांय खबरनवीसां सागे बातचीत करता थकां खींवर कह्यो के ई मामला मांय राज्य सरकार कने पुख्ता सबूत है, ई कारण राजस्थान स्वास्थ्य विज्ञान विश्वविद्यालय- आर.यू.एच.एस. रा कुलपति डॉ. सुधीर भण्डारी ऊं इस्तीफो देवण सारू कही ज्यो है।

0000

प्रदेश रा पीएमश्री केन्द्रीय विद्यालयां सारू तीन दिन री क्षमता संवर्धन कार्यशाला आज जयपुर मांय सरू व्ही। कार्यशाला रा उद्घाटन सत्र मांय स्कूल शिक्षा शासन सचिव कृष्ण कुणाल कह्यो के बुनियादी ढांचां ने मजबूत कर र पीएमश्री स्कूलां ने भणाई लिखाई रा बेहतरीन केन्द्र रा रूप मांय विकसित कर्या जावणा चाहिजे। वे विद्यार्थियां रो पूरो विकास तय करण सारू कोर्स सागे दूजी गतिविधियां ने बधावो देवण बाबत ई कह्यो। स्कूल शिक्षा शासन सचिव स्कूलां मांय नवाचार रा तौर ऊं दवाइयां रा गुणां वाळा पौधा रोपण बाबत ई कह्यो।

000000

सूचना अर प्रसारण मंत्रालय रा पत्र सूचना कार्यालय री ओर ऊं काल जयपुर रा राजस्थान इंटरनेशनल सेंटर मांय तीन नुवा बदली ज्या आपराधिक कानूनां रा बारा मांय क्षेत्रीय मीडिया सम्मेलन वार्तालाप राख्यो जावेला।

इण रो मकसद मीडियाकर्मियां ने भारतीय नागरिक सुरक्षा संहिता 2023, भारतीय न्याय संहिता 2023 अर भारतीय साक्ष्य अधिनियम 2023 र बारा मांय जाणकारी देवणो है।

000

प्रधानमंत्री नरेन्द्र मोदी महाराणा प्रताप री जयंती रे मौके वां ने सिरधा भाव सागे याद कीना है। सोशल मीडिया पोस्ट रे जरिये वे कह्यो के महाराणा प्रताप री जिंदगी हिम्मत अर खुद रा मान री निशाणी है, जो हमेशा प्रेरणा देती रहेवेला। केन्द्रीय गृहमंत्री अमित शाह ई महाराणा प्रताप ने याद करता थकां कह्यो के संस्कृति, खुद रा मान अर खुद माथे नाज करण वाळा ऐड़ा महानायक री जिंदगी ऊं देश हमेशा सीख लेतो रहेवेला। मुख्यमंत्री भजनलाल शर्मा ई सोशल मीडिया पोस्ट रे जरिये कह्यो के महाराणा प्रताप देशभक्ति ऊं जन-जन मांय अन्याय अर अधर्म रे खिलाफ लड़बा रो विश्वास जगायो। प्रदेश कांग्रेस अध्यक्ष गोविंद सिंह डोटासरा ई महाराणा प्रताप ने नमन करता थकां कह्यो के देश अर धर्म री हिफाजत सारु प्राण निछावर करण वाळा महाराणा प्रताप री वीरगाथा अमर रहेवेला। महाराणा प्रताप री जयंती रे मौके कोटपूतली-बहरोड़ जिला रा पावटा मांय आज खूनदान शिविर लगायी ज्यो।

000

राज्य मांय घणखर ठोड़ां आज ई जोरदार तावड़ा रे कारण जिंदगी माथे असर पड़्यो। बाड़मेर समेत कठे-कठे पारो 46 डिग्री सैल्सियस ताई पूग ग्यो। रात री बगत ई तापमान 24 ऊं 34 डिग्री सैल्सियस बीचे दर्ज कर्यो जा रह्यो है, जो सामान्य ऊं ऊंचो है। बाड़मेर अर बीकानेर मांय पारो 45 दशमलव 2 डिग्री सैल्सियस दर्ज करी ज्यो। मौसम केन्द्र जयपुर रा वैज्ञानिक हिमांशु शर्मा बतायो के प्रदेश मांय आज ई कठे-कठे अधिकतम तापमान 45 डिग्री सैल्सियस ऊं ऊंचो रह्यो। वे बतायो के काल ऊं नुवा पश्चिमी विक्षोभ रा असर ऊं कठे-कठे आंधी-बारिश रा आसार है।

-----

तेज तावड़ा ने ध्यान राखता थकां **सांचोर** जिला मांय विद्यार्थियां सारु स्कूलां रो बगत संवारे साढ़े सात ऊं ग्यारह बज्यां ताई राखण रा हुकम दिया ज्या है। सवाईमाधोपुर मांय ई 5 वीं कक्षा ताई रा विद्यार्थियां री छुट्टी अर 6 वीं ऊं 8 वीं कक्षा रा विद्यार्थियां सारु स्कूल रो बगत साढ़े 7 ऊं 11 बज्यां ताई करण रा हुकम दिया ज्या है। 9 वीं ऊं 12 वीं कक्षा रा विद्यार्थियां सारु स्कूल रा टेम मांय कोई बदलाव नी करी ज्यो है। चूरू मांय पीवण रा पाणी री परेशानी रे कारण 200 ऊं बत्ता गांवां मांय टैंकरां ऊं पाणी री पूर्ति करी जा रही है। **पाली** मांय मोबाइल प्याऊ सरु करी ज्यी है, जिण रे जरिये शहर रा न्यारा-न्यारा हलकां मांय पाणी मुहैया करायो जावेला। **जैसलमेर अर बाड़मेर** मांय आज दोपहरां सड़कां माथे पाणी रो छिड़काव करी ज्यो। **बीकानेर** मांय ई नगर निगम री ओर ऊं न्यारी-न्यारी ठौड़ां सड़कां माथे पाणी रो छिड़काव करायी ज्यो। **केकड़ी** री जिला कलेक्टर न्यारी-न्यारी ठोड़ां दौरो कर र पाणी री पूर्ति री व्यवस्था रो जायजो लीनो। **भीलवाड़ा अर नागौर** मांय ई जोरदार तावड़ो पड़ रह्यो है। **झालावाड़** मांय पड़ रह्या जोरदार तावड़ा ने ध्यान राखता थकां सगळा अस्पतालां मांय पीवण रा पाणी अर ओ.आर.एस. रा घोल री व्यवस्था करी ज्यी है। पाली मांय जिला कलेक्टर लक्ष्मीनारायण मंत्री

कलेक्ट्री मांय परिंदा सारू परिंदा बांध्या। ई बीचे **सलुम्बर** जिला रा सराड़ा, सेमारी, परसाद अर चावंड मांय आज सिंज्या बिरखा व्हेवण ऊं तपन ऊं साता मिली।

000

आखा तीज रे मौके बाळक जोड़ां रा ब्याह री शंका ने ध्यान राखता थकां सरकार सावचेती राख र ऐड़ा ब्याह नी व्हेवण—देवण सारू सगळा जरूरी जतन कर रही है। **चूरू** मांय सगळा तहसील मुख्यालयां माथे कन्ट्रोल रूम बणा र हलका पटवारी अर गिरदावर ने ध्यान राखण रा हुकम दिया ज्या है। बाळक जोड़ां रा ब्याह नी करावण रा बारा मांय जाग जगावण सारू महिला अधिकारिता विभाग री ओर ऊं हस्ताक्षर अभियान चलायी ज्यो। जिला कलेक्टर पुष्पा सत्यानी वां रा दस्तखत कर र अभियान री सरूआत कीनी। **शाहपुरा** जिला मांय ई हलका पटवारी, गिरदावर अर दूजा कर्मचारियां ने बाळक जोड़ां रा ब्याह रोकण सारू पाबंद करी ज्या है। सवाईमाधोपुर मांय ई सामाजिक न्याय अर अधिकारिता विभाग री ओर ऊं आज गैर सरकारी संगठनां अर बाल अधिकारिता विभाग समेत न्यारी—न्यारी एजेन्सियां रा नुमाइंदां सागे मीटिंग कर र बाळक जोड़ां रा ब्याह रोकण रा बारा मांय विचार करी ज्यो।

जिला मांय बाळक जोड़ां रा ब्याह रोकण सारू कन्ट्रोल रूम बणायी ज्यो है जठे ऐड़ा ब्याह व्हेवण ऊं जुड़ी जाणकारी दी जा सके है। ई रे अलावा चाईल्ड हैल्पलाईन नंबर 1098, कॉल सेन्टर रा नम्बर 181 अर पुलिस कन्ट्रोल रूम रा 100 नम्बर माथे फोन कर र ई जाणकारी दी जा सके है। **पाली** मांय तहसीलदार अर विकास अधिकारी जितेन्द्र बबेरवाल बाळक जोड़ां रा ब्याह री रोकथाम ऊं जुड़्या पोस्टर रो विमोचन करी ज्यो। ओ जागरूकता पोस्टर खास—खास चौराहां अर प्रतिष्ठानां माथे चस्पा कर्यो जावेला। **डूंगरपुर** मांय जिला कलेक्टर **अंकित कुमार सिंह** ने जागरूकता रथ को हरी झण्डी दिखाकर रवाना किया। रथ के माध्यम से ब्लॉक **डूंगरपुर दोवड़ा, आसपुर, सागवाड़ा, सीमलवाड़ा, विखली और झौंतरी** में बाल विवाह के दुष्परिणामों की जानकारी दी जाएगी।

0000

राष्ट्रपति द्रौपदी मुर्मू आज राष्ट्रपति भवन मांय देश री न्यारी—न्यारी हस्तियां ने पद्म पुरस्कार दे र नवाज रही है। पद्म पुरस्कार न्यारा—न्यारा हलकां मांय बेहतरीन काम करण वाळी हस्तियां ने दिया जावे है। राष्ट्रपति लारला महीना ई तीन हस्तियां ने पद्म विभूषण, आठ हस्तियां ने पद्म भूषण अर 55 हस्तियां ने पद्मश्री पुरस्कार दे र नवाज्या हा।

0000